



*Selasa, 20 Desember 2022*

**Ogen : Lukas 10:25-37**



**Ise Kin Temanku Manusia?**



Kita ngeluh labo terpersirangken ras kalak sideban. Nnggeluh i bas jabu, perpulungen, persadan, kuta/kota, negara bage pe i bas doni enda. Bas kerina ingan siperluken kalak sideban ras kalak sideban pe perlu kita. Bas Pustaka rusur ipersingeti kelengilah temannu manusia bagi kam engkelengi dirindu jine. Arah kata enda turah penungkunen: ise kin temanku manusia? Si sada sangkep ngeluh, entah sada gereja, sada persadan ras sidebanna. Melala turah pemahamen maka teman manusia e me si lit iketen darah ras kita bagi kade-kade, entah sitandan ras kita. Tuhan Jesus nuriken si enda man ajar-ajarNa arah turi-turin sekalak si kena rampok bas perdalanen. Kalak Lewi ras imam ngidah kecibal kalak si kena rampok e tapi **nilah ia**. Kalak Samaria mentas i bas ingan e minter isampatina, itambarina dingin iberekenna jaminen segelah kalak e tuhu-tuhu banci madan. Tandai kalak Samaria kin si irampok enda ndai? LANG. Engkai maka bage perbahanenna? Kalak Samaria jadi teman man kalak siirampok e ndai; **mekuah atena**, e maka isampatina. Palas pertemanen kalak Samaria ras kalak si irampok e me pusuh si ersuruh guna nampati. Labo lit sura-surana muat keuntungan tapi tuhu-tuhu iberekenna simehulina sabap kepate ia, labo segelah iidah kalak tapi segelah selamat temanna e. Enda me teman si tuhu-tuhu. La ngenen ikaten darah, la ngenen suku, la ngenen perbahanen tapi mereken diri guna kiniulin teman. Moria siikelengi Tuhan, malem ateta ibereken Dibata man banta kejuah-juahen, kesehaten rikut ras kesangapen, tapi la kepeken cukup kita ngukurken dirinta saja, mari nehen enterem kalak si sangana ngarapken teman si tuhu-tuhu bas kekurangan entah perbebenna, berekenlah dirinta jadi teman man kalak sideban sabap e perintah Tuhan Jesus.



*“Aku enda teman man enterem jelma”*

